



საბაკალავრო ნაშრომის შესრულების ინსტრუქცია

I თავი

1. საბაკალავრო ნაშრომის თემის შერჩევისა და დამტკიცების პროცედურა:

- საბაკალავრო ნაშრომის თემის შერჩევა ხდება სტუდენტის მიერ საბაკალავრო ნაშრომის ხელმძღვანელთან შეთანხმებით (სტუდენტი ირჩევს თემას, ათანხმებს თემის ხელმძღვანელთან და განცხადებით მიმართავს რექტორს, საბაკალავრო ნაშრომის თემის და თემის ხელმძღვანელის დამტკიცების თაობაზე), არაუგვიანეს სემესტრის პირველი სასწავლო კვირისა.
- საბაკალავრო ნაშრომის ხელმძღვანელი შეიძლება იყოს დოქტორის ან კანონმდებლობით მასთან გათანაბრებული აკადემიური ხარისხის მქონე აკადემიური პერსონალი ან მოწვეული სპეციალისტი.
- რექტორის მიერ საბაკალავრო ნაშრომის თემის დამტკიცების შემდეგ სტუდენტი ხელმძღვანელთან ერთად იწყებს ნაშრომზე მუშაობას.

II თავი

1. საბაკალავრო ნაშრომის არქიტექტონიკა:

საბაკალავრო ნაშრომის სტრუქტურაში იგულისხმება: **სატიტულო გვერდი (გარე ყდა); რეზიუმე; შინაარსი; ძირითადი ტექსტი; დასკვნა; გამოყენებული ლიტერატურის ნუსხა; დანართი (არსებობის შემთხვევაში).**

სატიტულო გვერდი (გარე ყდა): უნდა იყოს სტანდარტული ფორმის. იგი აუცილებლად უნდა მოიცავდეს საბაკალავრო ნაშრომის დასახელებას, სტუდენტის გვარს, სახელს და ტექსტს „წარმომადგენელია ბაკალავრის აკადემიური ხარისხის მოსაპოვებლად“, „თბილისის ღია სასწავლო უნივერსიტეტი“, მმასზე ასევე უნდა განთავსდეს თვე და წელი, როდესაც არის დანიშნული საბაკალავრო ნაშრომის დაცვა. აღნიშნული გვერდის ნომერია-1, მაგრამ იგი არ მიეთითება.

რეზიუმე: მასში მკაფიოდ უნდა იყოს გადმოცემული შესრულებული სამუშაოს მოკლე შინაარსი და ძირითადი შინაარსი. როგორც წესი, რეზიუმე არ შეიცავს სქოლიოს, ცხრილებს, სქემებს და სხვა.

რეზიუმეს მოცულობა უნდა იყოს 250-400 სიტყვამდე. რეზიუმე შესრულებული უნდა იყოს ორ ენაზე საბაკალავრო ნაშრომისა და ერთ-ერთ უცხო ენაზე.

შინაარსი: საბაკალავრო ნაშრომი უნდა შეიცავდეს სარჩევს. გვერდის ნომრები უნდა განთავსდეს მარჯვენა მინდორთან. დასაშვებია სათაურსა და გვერდის ნომერს შორის არსებული სივრცის შევსება სიმბოლოებით: „ „_“ და სხვა.

ძირითადი ტექსტი: ძირითადი, ტექსტობრივი ნაწილი შესაძლებელია დაიყოს თავებად და

სხვადასხვა დონის ქვეთავებად. იგი აუცილებლად უნდა შეიცავდეს **შესავალს**. შესავალ ნაწილში მოცემული უნდა იყოს საბაკალავრო ნაშრომში დასმული პრობლემის აღწერა, აქტუალობა და

პრაქტიკული მნიშვნელობა. შესავალის მოცულობა არ უნდა აღემატებოდეს ძირითადი ტექსტის მოცულობის 5%-ს.

დასკვნა: საბაკალავრო ნაშრომი აუცილებლად უნდა შეიცავდეს დასკვნას, რომელიც მოკლედ უნდა იქნას ჩამოყალიბებული.

გამოყენებული ლიტერატურის სიის წარმოდგენისას გასათვალისწინებელია შემდეგი მოთხოვნები: ლიტერატურის სია წარმოდგენილი უნდა იყოს ანბანური თანმიმდევრობით. ჩამონათვალში ჯერ უნდა მიეთითოს გამოცემები ქართულ ენაზე, შემდეგ - უცხოურ ენებზე;

გამოყენებული წყაროები: გამოყენებული ლიტერატურის ნუსხა უნდა განთავსდეს ნაშრომის ბოლოს, ძირითად ტექსტში მითითებული თანმიმდევრობის მიხედვით. ლიტერატურული წყაროს მითითებისას დაცული უნდა იქნას შემდეგი სტილი:

➤ **სტანდარტები ბიბლიოგრაფიის შედგენისათვის**

წიგნის ან მონოგრაფიის გამოყენების შემთხვევაში:

- ავტორის სახელი და გვარი,
- სათაური
- გამოცემის ადგილი:
- გამომცემელი,
- წელი
- გვერდი
- **ნიმუში**

1. გეგეჭკორი, არნოლდ კავკასია - ბუნების საგანძური. (თბილისი: მერიდიანი, 2007).

2. Ball, Philip Bright Earth: Art and the Invention of Color (New York: Farrar, Straus and Giroux, 2001), 140.

დამოწმება ტექსტში

(გვარი წელი, გვერდი)

(Ball 2004, 6-18)

(გეგეჭკორი 2007, 27)

თუ ვიმოწმებთ წიგნს, რომელსაც ჰყავს ორი ან სამი ავტორი

- პირველი ავტორის გვარი, სახელი,
- მეორე ავტორის სახელი, გვარი და მესამე ავტორის სახელი გვარი.
- წელი.
- სათაური.
- გამოცემის ადგილი:
- გამომცემელი.

ნიმუში:

1. კეკელიძე, კორნელი და ალექსანდრე ბარამიძე. ძველი ქართული ლიტერატურის ისტორია: V-XVIII სს. (თბილისი: თბილისის უნივერსიტეტის გამომცემლობა, 1987).

2. Appleby, Joyce, Lynn Hunt, and Margaret Jacob. Telling the truth about history. (New York: W.W. Norton & Company, 1994).

დამოწმება ტექსტში:

(გვარი და გვარი წელი, გვერდი)

(კეკელიძე და ბარამიძე 1987, 45);

(Appleby, Hunt and Jacob 2005, 27)

სამეცნიერო ჟურნალების სტატია

დამოწმება ბიბლიოგრაფიაში:

- ავტორის გვარი, სახელი.
- ჟურნალის გამოსვლის წელი.
- სტატიის სათაური.
- ჟურნალის სახელწოდება,
- № ნომერი:
- გვერდები.

ნიმუში

1. ბუთხუზი, ნათია. 2016. ლოგისტიკური პროცესების აუტოსორსინგი. თბილისის ღია სასწავლო უნივერსიტეტის სამეცნიერო შრომების კრებული #7:71-74

2. Beattie, J.M. 1974. The pattern of crime in England, 1660-1800. Past and Present, no. 62:47-95.

დამოწმება ტექსტში:

(გვარი წელი, გვერდი)

(ბუთხუზი 2016, 71)

(Beattie 1974, 90)

ინტერნეტში განთავსებული მასალა

ბიბლიოგრაფიაში:

- გვარი, სახელი.
- წელი.
- სათაური.
- გამოცემის ადგილი:
- გამომცემელი. URL მისამართი
- (წვდომის თარიღი)

ნიმუში:

ჯორჯაძე არჩილ 2010. წერილები. თბილისი: ილიას უნივერსიტეტის გამომცემლობა,

<https://iliauni.edu.ge/ge/iliauni/samsaxurebi-da-servisebi-7/gamomcemloba1/cignebi/archil-djordjadze-werilebi.page>

(1.05.2016)

Samora, Julian and Patricia Vandell Simon. A History of the Mexican-American People. Rev. ed. East Lansing, MI: Julian Samora Research Institute, Michigan State University, 2000.

<http://www.jsri.msu.edu/museum/pubs/MexAmHist/chapter14.html#six> (19.12.2005).

ტექსტში:

(გვარი წელი)

(Samora and Simon 2000).

(ჯორჯაძე 2010)

სახელისუფლებო დოკუმენტების გამოყენების შემთხვევაში:

- მთავრობის (ქვეყნის, ქალაქის, ოლქის ან სხვა ერთეულის) და ხელისუფლების ორგანოს (საკანონმდებლო ორგანოს, აღმასრულებელი დეპარტამენტის, სასამართლო ბიუროს, საბჭოს, კომისიის ან კომიტეტის) სახელწოდება, რომელმაც გამოსცა დოკუმენტი;
- დოკუმენტის ან კრებულის სათაური, თუ ასეთი არსებობს (როგორც წესი, დახრილი შრიფტით);
- ავტორის, რედაქტორის ან შემდგენლის სახელი და გვარი, თუ მითითებულია;
- ანგარიშის ნომერი ან სხვა საიდენტიფიკაციო ინფორმაცია;
- მონაცემები პუბლიკაციის შესახებ: გამოცემის ადგილი და გამომცემლის სახელწოდება (აშშ-ის ფედერალური მთავრობის მიერ გამოცემული აქ განხილული ყველა პუბლიკაციისთვის გამოიყენეთ აღნიშვნები Washington, DC, და Government Printing Office), გამოქვეყნების თარიღი;
- გვერდის ნომრები ან ადგილის დასადგენი სხვა მონაცემები, თუ საჭიროა

ნიმუში

ბიბლიოგრაფიაში

საქართველოს ეროვნული ბანკის პრეზიდენტის ბრძანება *საქართველოს სამოქალაქო კოდექსის 625-ე მუხლის მიზნებისათვის ეფექტური საპროცენტო განაკვეთის და მსესხებელზე დაკისრებული ფინანსური ხარჯების განმარტების თაობაზე* №136/04 . თბილისი 2017 წლის 26 სექტემბერი

Food Security Act of 1985, HR 2100, 99th Cong., 1st sess., Congressional Record 131, no. 132, daily ed. (October 8, 1985): H 8353-8486.

ტექსტში,

1. (საქართველოს სამოქალაქო კოდექსის 625-ე მუხლის მიზნებისათვის ეფექტური საპროცენტო განაკვეთის და მსესხებელზე დაკისრებული ფინანსური ხარჯების განმარტების თაობაზე 2017, 14)

2. (Food Security Act of 1985, Record 131, no. 132)

დანართი (არსებობის შემთხვევაში): მასში შესაძლებელია განთავსდეს: მონაცემთა ცხრილები, ნახაზები, გაანგარიშებები, ფოტოსურათები, დიაგრამები, სქემები და სხვა. ისინი შესაძლებელია შესრულებულ იქნას ნებისმიერი სხვა ფორმატზე, მაგრამ არ იკინძება ნაშრომთან ერთად.

2. საბაკალავრო ნაშრომის გაფორმების დროს დაცული უნდა იყოს შემდეგი ნორმატივები:

საბაკალავრო ნაშრომის მოცულობა უნდა იყოს არანაკლებ 25 და არაუმეტეს 50 გვერდისა.

ენა: საბაკალავრო ნაშრომი შესრულებული უნდა იყოს ქართულ ენაზე. A4 ფორმატის თეთრ ქაღალდზე, ბეჭედა წარმოებს ერთ გვერდზე. საბაკალავრო სპეციალობისა და საბაკალავრო ნაშრომის თემის თავისებურებიდან გამომდინარე, ხელმძღვანელთან და სკოლის საბჭოსთან წინასწარი შეთანხმების საფუძველზე დასაშვებია საბაკალავრო ნაშრომის გაფორმება და დაცვა უცხოურ ენაზეც. უცხოურ ენაზე წარმოდგენილ საბაკალავრო ნაშრომს თან უნდა ახლდეს დამატებითი ქართულენოვანი ანოტაცია.

მინდორი: არე მარცხნიდან და მარჯვნიდან არანაკლებ 2 და არაუმეტეს 3 სანტიმეტრისა; არე ზემოდან და ქვემოდან არანაკლებ 3 და არაუმეტეს 4 სანტიმეტრისა.

შრიფტი: საბაკალავრო ნაშრომი შესრულებულ უნდა იქნას შრიფტით **~ sylfaen ~** (უცხო ენაზე შესრულების შემთხვევაში შესაბამისი შრიფტით). შრიფტის **ზომა 12**. თავებისა და ქვეთავების დასახელებაში შესაძლებელია გამოყენებული იქნას უფრო დიდი შრიფტი, ზომით - 14.

სტრიქონებს შორის მანძილი: ძირითადი ტექსტისათვის **ინტერვალი არის 1,5**. მცირე ზომის სექციებისთვის (შინაარსი, ცხრილებისა და ნახაზების ნუსხა, რეზიუმე, სქოლიო, შენიშვნა და სხვა) აიღება ინტერვალი 1.

გვერდების ნუმერაცია: ყველა გვერდი დანომრილი უნდა იქნას თანმიმდევრობით. თავახის მარჯვენა ქვედა კუთხეში შრიფტის ზომით - **10**. (არ ინომრება მარტო პირველი სატიტულე გვერდი).

თავებისა და ქვეთავების დასახელებები: ყველა თავისა და ქვეთავის დასახელება უნდა იქნას ჩართული სარჩევში. ყველა თავი უნდა იწყებოდეს ახალი გვერდიდან, ხოლო ქვეთავი შეიძლება გაგრძელდეს იმავე გვერდიდან.

სქოლიო: სქოლიო უნდა განთავსდეს გვერდის ბოლოს. შრიფტის ზომა - 10. სქოლიოს განთავსებისას ნუმერაცია წარმოებს სიმბოლოებით ან არაბული ციფრებით, რომელიც შესაძლებელია დაიწყოს ყოველ გვერდზე თავიდან.

III თავი

1. საბაკალავრო ნაშრომის დაცვის პროცედურა:

საბაკალავრო ნაშრომის დაცვა ხდება საგანმანათლებლო პროგრამის სწავლების ენაზე (გარდა ამ წესის II თავის მე-2 პუნქტით გათვალისწინებული შემთხვევისა).

საბაკალავრო ნაშრომი წარმოდგენილი უნდა იქნას 1 ეგზემპლარის სახით. თან უნდა დაერთოს კომპაქტ-დისკზე ჩაწერილი ელექტრონული ვერსია და არსებობის შემთხვევაში - პრეზენტაცია.

✓ სტუდენტი დასრულებულ, სრულყოფილად გაფორმებულ, **აკინძულ და ყდაში ჩასმულ** საბაკალავრო ნაშრომს წარუდგენს ხელმძღვანელს. დასრულებული ნაშრომის ხელმძღვანელისათვის წარდგენის ბოლო ვადაა მე-16 სასწავლო კვირა. ხელმძღვანელი გაეცნობა ნაშრომს, წერს დასკვნას და გადასცემს სკოლის დეკანს.

✓ საბაკალავრო ნაშრომის **ხელმძღვანელის დასკვნა** წარმოდგენილი უნდა იყოს ნაბეჭდი სახით, არანაკლებ ორ გვერდზე, A4 ფორმატით, შრიფტი - sylfaen; შრიფტის ზომა - 12;

საბაკალავრო ნაშრომის ხელმძღვანელის დასკვნაში აუცილებლად უნდა იყოს დაფიქსირებული: ნაშრომის სახელწოდება; ნაშრომის ავტორის ვინაობა; ნაშრომის მოკლე მიმოხილვა; ნაშრომის ძლიერი და სუსტი მხარეები; ნაშრომის ავტორის მიერ გამოვლენილი ცოდნისა და უნარების ხარისხის აღნიშვნა; ნაშრომის ზოგადი დახასიათება; პირადი აზრი ბაკალავრის აკადემიური ხარისხის მინიჭება-არმინიჭების

შესახებ. დასკვნა წარმოდგენილ უნდა იქნეს ნაბეჭდი სახით და დამოწმებული იყოს ხელმძღვანელის ხელმოწერით.

სკოლის საბჭო ნიშნავს რეცენზენტს, რომელიც უნდა იყოს დარგის სპეციალისტი დოქტორის (ან კანონმდებლობით მასთან გათანაბრებული) აკადემიური ხარისხით, და გადასცემს მას საბაკალავრო ნაშრომს სარეცენზიოდ.

რეცენზია უნდა შეიცავდეს:

- ნაშრომის სახელწოდებას;
- ნაშრომის ავტორის ვინაობას;
- ნაშრომის მოკლე მიმოხილვას: ნაშრომის არქიტექტონიკა და ტექნიკური პარამეტრები სრულ შესაბამისობაშია დადგენილ სტანდარტთან; ნაშრომის შესავალში დასახულ მიზნებს სრულად შეესაბამება დასკვნაში ასახული კვლევის შედეგები ; აზრი სტრუქტურირებულად ზუსტადაა გადმოცემული - სისტემურადაა ფორმირებული: განხილული საკითხების ადეკვატურობა და შესწავლის ლოგიკური თანმიმდევრობა დაცულია ; დასმული საკითხი არსებითად ამოწურულია, განხილულია რელევანტური ლიტერატურა, დასკვნები არგუმენტირებულია; ციტირების ტექნიკა დაცულია და ნაშრომის ორიგინალობა დადასტურებულია ავტორის მიერ.
- ნაშრომის ზოგად შეფასებას; პირად აზრს ბაკალავრის აკადემიური ხარისხის მინიჭება-არმინიჭების შესახებ.

რეცენზენტი ვალდებულია გადასცეს საბაკალავრო ნაშრომი და რეცენზია საბაკალავრო ნაშრომების დაცვის კომისიას ნაშრომის დაცვამდე არაუგვიანეს სამი დღისა. რეცენზენტის შეფასება შეიძლება იყოს დადებითი ან უარყოფითი. საბაკალავრო ნაშრომის უარყოფითად შეფასების შემთხვევაში ინიშნება მეორე რეცენზენტი.

მეორე რეცენზენტის უარყოფითი რეცენზიის შემთხვევაში სტუდენტი არ დაიშვება დაცვაზე და მომდევნო წელს ახალ თემას წარმოადგენს დასაცავად ზოგადად დადგენილი პროცედურის გავლით.

მეორე რეცენზენტის დადებითი რეცენზიის შემთხვევაში სტუდენტი დაიშვება დაცვაზე და დაცვის პროცედურაში მონაწილეობას მიიღებს ორივე რეცენზენტი.

✓საბაკალავრო ნაშრომის დაცვა უნდა მოხდეს საჯაროდ, უნივერსიტეტის რექტორის ბრძანებით დამტკიცებულ კომისიაზე. კომისიის წევრთა შემადგენლობა უნდა იყოს არანაკლებ 3 პროფესორისა და მდივანი.

✓საბაკალავრო ნაშრომების დაცვის თარიღი განისაზღვრება რექტორის ბრძანებით -სწავლების მე-19-20 კვირაში. საპატიო მიზეზის არსებობისას, სტუდენტის ინტერესების გათვალისწინებით, პირადი განცხადების საფუძველზე, საბაკალავრო ნაშრომის დაცვა შეიძლება ჩატარდეს ინდივიდუალურ რეჟიმში, არაუადრეს ბოლო სალექციო კვირისა (მე-15 კვირა). (რეგულირდება რექტორის ინდივიდუალური სამართლებრივი აქტით). დაცვის პროცედურა უნდა ეფუძნებოდეს ობიექტურობისა და გამჭვირვალობის პრინციპს.

✓სტუდენტი საბაკალავრო ნაშრომის დაცვაზე დაიშვება, თუ მას ექნება დამლეული საბაკალავრო პროგრამით გათვალისწინებული სავალდებულო სასწავლო კურსები და საბაკალავრო ნაშრომზე-ხელმძღვანელისა და რეცენზენტის დადებითი დასკვნა/რეცენზია.

✓საბაკალავრო საგამოცდო კომისიის თავმჯდომარე დამსწრე საზოგადოებას აცნობს სტუდენტის ვინაობას, მის სპეციალობას, საბაკალავრო ნაშრომის თემას, ხელმძღვანელს და კითხულობს რეცენზენტის/რეცენზენტების დასკვნას. ამის შემდეგ სიტყვა მოხსენებისათვის ეძლევა სტუდენტს.

სტუდენტი აკეთებს 10-15-წუთიან მოხსენებას. სტუდენტის მოხსენებაში მოკლედ და მკაფიოდ უნდა იყოს ჩამოყალიბებული და მითითებული საბაკალავრო ნაშრომის მიზნები, ამოცანები, არსებული მოსაზრებები დასმული პრობლემის შესახებ. უფრო ვრცლად უნდა იქნეს წარმოდგენილი შესრულებული სამუშაოს ანალიზი. ბოლოს, კონკრეტულად ჩამოყალიბდეს მიღებული დასკვნები, მათი თეორიული მნიშვნელობა და პრაქტიკული ღირებულება.

მოხსენების დროს სტუდენტს შეუძლია გამოიყენოს საილუსტრაციო საშუალებები. მოხსენების დამთავრებისთანავე სტუდენტი პასუხობს შეკითხვებს, რის შემდეგაც სიტყვა ეძლევა მის ხელმძღვანელს. იგი დამსწრე საზოგადოებას აწვდის ინფორმაციას სტუდენტის მიერ გაწეული მუშაობის, სამეცნიერო-კვლევით პროცესში მის მიერ გამოვლენილი უნარ-ჩვევების შესახებ და დასკვნას ნაშრომის თაობაზე.

✓ დასკვნით სიტყვაში სტუდენტი გამოთქვამს თავის მოსაზრებას შენიშვნებისა და რეკომენდაციების ირგვლივ. შემდეგ იმართება დისკუსია, რომელშიც საბაკალავრო საგამოცდო კომისიის წევრებთან ერთად მონაწილეობას იღებენ დაინტერესებული პირები დამსწრე საზოგადოებიდან.

✓ ამით საბაკალავრო ნაშრომის დაცვა მთავრდება.

IV თავი

1. სტუდენტის შეფასება

საბაკალავრო ნაშრომის დაცვის პროცედურის დასრულების შემდეგ საბაკალავრო დაცვის კომისია იწვევს დახურულ სხდომას, რომელზეც კომისიის თითოეული წევრი აფასებს თითოეული სტუდენტის საბაკალავრო ნაშრომს მაქსიმუმ 100 ქულით, შემდეგი სქემის მიხედვით:

- ნაშრომის არქიტექტონიკა-10 ქულა;
- დასახული მიზნებისა და კვლევის შედეგების ურთიერთშესაბამისობა-10 ქულა;
- გამოყენებული წყაროების მრავალფეროვნება და ვალიდურობა-10 ქულა;
- ციტირების ტექნიკა-10 ქულა;
- პრეზენტაციის ტექნიკა და ტექნოლოგია -10 ქულა;
- პრობლემის დასმა და წარმოჩენა -10 ქულა;
- ანალიზის უნარი-10 ქულა;
- დასკვნების არგუმენტაცია-10 ქულა;
- პოზიციის დაცვა-10 ქულა;
- რეგლამენტის დაცვა-10 ქულა.

1¹. საბაკალავრო პროგრამის მიზნებიდან და შედეგებიდან გამომდინარე ნაშრომის შეფასების კრიტერიუმები და მათი წონა შეიძლება იყოს განსხვავებული (აკად. და წარმომადგენლობითი სენატის დადგენილება # 80 22.03.2018)

1. საბაკალავრო ნაშრომის დაცვაზე სტუდენტის შეფასება არის კომისიის თითოეული წევრის მიერ მისთვის მინიჭებულ შეფასებათა საშუალო არითმეტიკული.

2. საბაკალავრო ნაშრომის საბოლოო შეფასება განისაზღვრება შემდეგი სისტემის შესაბამისად:

დადებითი შეფასება:

- (A) ფრიადი - მაქსიმალური შეფასების 91% და მეტი;
- (B) ძალიან კარგი - მაქსიმალური შეფასების 81-90%;
- (C) კარგი - მაქსიმალური შეფასების 71-80%;
- (D) დამაკმაყოფილებელი - მაქსიმალური შეფასების 61-70%;

(E) საკმარისი - მაქსიმალური შეფასების 51-60%;

უარყოფითი შეფასება:

(FX) ვერ ჩააბარა - მაქსიმალური შეფასების 41-50%, რაც ნიშნავს, რომ ბაკალავრს ჩასაბარებლად მეტი მუშაობა სჭირდება, წაყენებულ მოთხოვნებს მნიშვნელოვანი ხარვეზების გამო ვერ აკმაყოფილებს და ენიჭება მომდევნო წელს გადამუშავებელი საბაკალავრო ნაშრომის წარდგენის უფლება.

(F) ჩაიჭრა - მაქსიმალური შეფასების 40% და ნაკლები, რაც ნიშნავს, რომ ბაკალავრი წაყენებულ მოთხოვნებს სრულიად ვერ აკმაყოფილებს და კარგავს იგივე ნაშრომის წარდგენის უფლებას.

2. დაცვის შედეგები.

საბაკალავრო საგამოცდო კომისიის დახურული სხდომის დამთავრების შემდეგ კომისიის თავმჯდომარე საჯაროდ აცხადებს საბაკალავრო ნაშრომის შეფასებას.

საბაკალავრო ნაშრომის შესრულება /დაცვა ითვლება ჩაბარებულად, თუ საბაკალავრო ნაშრომის ქულა მაქსიმალური შეფასების 50%-ზე მეტია.

საბაკალავრო ნაშრომის შესრულებისა და დაცვის დადებითი შეფასების შედეგები : საბაკალავრო ნაშრომის შესრულებისა და ზეპირი დაცვის ჩაბარების შემთხვევაში კურსდამთავრებულს ენიჭება ბაკალავრის აკადემიური ხარისხი. ბაკალავრის აკადემიური ხარისხის დამადასტურებელ დიპლომს ხელს აწერს უნივერსიტეტის რექტორი და სკოლის დეკანი. დიპლომს დაესმის უნივერსიტეტის ბეჭედი.

საბაკალავრო ნაშრომის უარყოფითი შეფასების შედეგები.

საბაკალავრო ნაშრომის უარყოფითად შეფასების შემთხვევაში, სტუდენტი დამატებით სემესტრში გადის სემესტრულ რეგისტრაციას და ეძლევა ახალ/იმავე თემაზე შესრულებული ნაშრომის წარმოდგენის უფლება.

საბაკალავრო ნაშრომის დაცვის ბათილად გამოცხადების, ბაკალავრის დიპლომის ჩამორთმევისა და მინიჭებული ხარისხის გაუქმების საფუძველია აკადემიური კეთილსინდისიერების დარღვევის (პლაგიატი) გამოვლენა.